

# «Nus soras pintgas havevan massa mummas»

Sora Ermelinda Maissen da Siltginas sur Sumvitg festivescha il giubileum da profess dad aur

CUN SORA ERMELINDA  
HA SUSI ROTHMUND / ANR DISCURRIU

■ Oz han las giuvnas da 20 onns massa plans e giavischs pil futur – daventar muniessa vul denton praticamein negina. Tut auter fuva quei avon 50 onns cu sora Ermelinda da Siltginas/Sumvitg ei entrada en claustra dallas soras dominicanas a Glion. Il medem di sco ella ein numnadamain era sora *Ulrica* e sora *Armina* (ch'ei sia atgna sora) entradas en claustra. Dallas dudisch soras dalla famiglia Maissen ein quater daventadas muniessas. En claustra ha sora *Ermelinda* anflau bia satisfacziun, era duront sia lavur en stiva da cuser.

**Cun cons onns essas Vos entrada en claustra?**

Sora Ermelinda: Cun 20 onns.

**Tgei ei stau il motiv per quella decisiun?**

Entras il plaidd da Diu, seigi quei ord la s. Scartira ni el survetsch divin, ha in giavisch intern da suandar Cristus en ina cuminonza da persunas ch'han la medema intenziun buca bandunau mei pli.

**Il medem onn sco Vos ein aunc duas giuvnas da Sumvitg entradas en claustra – ha quei influenzau Vossa decisiun?**

Na, insumma buc. Quella decisiun per la via della veta sto mintgin prender sez! Naturalmein hai jeu giu in nundetg placher che mia sora pintga, l'Eucaria (sora Armina), ha priu la medema decisiun. E tgei legrevia sorpresa che mia consolaria, l'Imelda Flury (sora Ulrica) da Clavadi, ei senza nies saver era sedecida per quella clamada. Dil mument anora, che nus havein palesau nosssa via ina a l'autra, havein nus era encuretgin in termin dad ir ensemen ella claustra a Glion.

**Essas Vos carsechida si en ina famiglia fetg religiosa?**



Sora Ermelinda Maissen da Siltginas/Sumvitg.

FOTO S. ROTHMUND

Gie, nus essan carschidas si en ina famiglia cartenta e fetg religiosa. Nossas ondas, sora Eucaria e sora Josefina, eran gia a Glion en claustra. Era nossas atgnas soras, sora Theolinda (entrada 1956) e sora Berta (entrada 1961) eran dapi diesch e tschun onns soras dominicanas. Sora Theolinda ei morta 1995, ella festivass dumengia il profess da diamant (60 onns).

**Las soras dominicanas lavuran u en claustra ni ordeifer – tgei ei stau Vies pensum?**

All'entschatta dil noviziat hai jeu luvrau sco mia sora empau dapertut. Da quei mument che la superiura generala ha enderschiu ch'jeu cusi bugen sun jeu gia l'auter di setschentada en stiva da cuser e miu siemi ei ius en vigur.

**Ha quei cuntentau Vos?**

Naturalmein, avon ch'ir en claustra havevel jeu detg a mia sora ch'era cusunza: Sche ti audas ch'jeu sundel en claustra vid il cuser, lu sas ti ch'jeu sundel ventireivla!

**Tgei pensum haveis Vos actualmein en claustra a Glion?**

Jeu sundel la menadra en stiva da cuser e meinel uss en duas conluvreras laicas en mia lavur. Sch'jeu crodel ora in di ston ellas enconuscher tut las lavurs ch'ei colligiadas cun quei menaschi.

**Haveis mai giu il giavisch dad ir ellas missiuns?**

Na, insumma buc, schegie ch'jeu havevel, sco sora Armina era, in'onda ed in'atgna sora a Taiwan. Mia finamira ei adina stada quella da dar perdetga da mia cardientscha ell'atgna patria.

**Sche Vos mireis anavos sin Vossa veta, tgei ei stau il pli bi?**

La biala affonza ch'jeu hai astgau guder en casa paterna e mias soras, ch'jeu havevel fetg bugen, schegie ch'jeu selementavel bein enqualga, che nus pintgas hagian massa mummas e stoppien obedir a tuttas! En claustra l'oraziun cun la biala liturgia, principalmein dal-

las fiastas grondas e la meisa communabla.

**Haveis mai deplorau Vossa decisiun da viver sco muniessa?**

Mintgatun sun jeu schon sedumandada, sun jeu veramein sin la dretga via.

**Cu Vos essas entrada en claustra fagevan aunc dabia giuvnas quei pass. Oz dat ei strusch muniessas giuvnas – saveys Vos daco che quei ei aschia?**

Nus havein oz tut in auter temps. Ils biars vulan lur libertad. Els vulan seligiar cun nuot e cun negin. En biaras familias ein las ragischs religiosas e la perschuasiun dall'atgna cardientscha empau seccadas vi. Era la situaziun en nosssa baselgia ei buc aschi attractiva per giuvnas ch'havessen il giavisch ed il carisma da luvrar ella pastoraziun.

**E co ei quei stau da viver cul celibat?**

Entras l'atgna decisiun dad ir en claustra eis ei era stau clar che la veta claustrala ei ina veta celibatara.

**Con temps liber/vacanzas haveis Vos giu sco sora dominicana? Ei quei avunda e co haveis passentau il temps liber?**

Era per nus dominicanas ein las vacanzas fetg impurtontas. Denter il temps da nosssa liturgia, oraziun e meisa comunabla spetga sin nus il pensum da mintgadi. Pli paucas soras che pon aunc luvrar e pli bia lavur che schai sillas autras. Perquei ein il temps liber e las vacanzas in grond schenghetg. Igl ei in prender distanza dil mintgadi e veser bia caussas e situaziuns suenter cun auters egl. Quei fa bein a mintgina. Per mei eis ei cagar si novas forzas ella natira ni leger in bien cudisch.

**Dispona ina muniessa dad agens daners, sche gie – haveis era giu la pusseivladad da dar ora quels tenor Vos giavischs?**

Gie, nus survegnin mintg'onn 100 francs daner da sac. Per quels stuein nus dar giu quen a negin. Per gl'auter survegnin nus tut quei che nus duvrein en claustra.

**Selegreis silla fiasta da dumengia?**

Silla fiasta dil giubileum selegrel jeu fetg cun in grond engraziament el cor enviars la cuminonza ed en special enviars Diu. El ha menau mei bein atras cuntradas sulleglivas, mo era atras enqual brentina. Da quels dis astgan ins era sentir fetg co ins vegn purtaus dalla cuminonza.

**Tgei ei Vies pli grond giavisch pil futur?**

Miu giavisch ei ch'ei dess el futur gliueud giuvna cul carisma da fundar puspei ina cuminonza che fuss prompta d'annunziar il plaidd da Diu e pastorar nossas pleivs nua ch'ils spirituals mauncan.

**Sche Vos mireis anavos sin Vossa veta – fagesses aunc ina ga il medem?**

Quei ei ina fetg greva damonda, ch'jeu sai buca rispunder. Oz vesess jeu forsa aunc autras semegliantas e pusseivlas vias.

## ■ CUERA

### Pic-nic musical

(cp) Dumengia, ils 30 da settember 2018 dallas 16.00 entochen allas 19.00 dat ei in pic-nic musical el «Fürstenwald» sur Cuera. Ei vegn presentau tocs musicals cumpo ni sez ed arias classicas da Léo Delibes, Franz Lehár, Emmerich Kálmán, Charles Gounod e Wolfgang Amadeus Mozart. D'udir ein *Quirina Lechmann* (sopran),

*Urs Senn* (violina), *Reto Senn* (clarinetta), *Dimitrios Karaman* (clavazin), *Nikolaus Schmid* (act) e *Gianin Conrad* (equipaziun). Ei vegn purschiu in aperitiv ed ina ligiongia da barsar.

Informaziuns sut [www.salonbruchstein.wixsite.com/chur](http://www.salonbruchstein.wixsite.com/chur) ni [www.facebook.com/salonbruchstein](http://www.facebook.com/salonbruchstein). Reservaziuns sut [l.quirina@hotmail.com](mailto:l.quirina@hotmail.com) ni 079 197 34 71.



In pic-nic in ga en in'autra fuorma. MAD

reclama

LA POSTA È QUA. PER TUTS.

Ad Andeer era per rumantsch. La filiala dad Andreas Tschalèr è impurtanta per la regiun. Ils indigens e giasts da tut il mund vegnan gugent sperasvi.

post.ch/andreas

LA POSTA